

Pastoor Jairo Maduro

“Bernadina henter su bida tabata un ofrenda pa Aruba mes”



ORANJESTAD – Acto di entiero di “Mama di Cultura”, sra. Bernadina Growell (q.e.p.d.) ta uno inolvidabel, no solamente pa e hecho di e caliber di e gran persona cu tabata Bernadina, sino tambe pa e ceremonia cu a ser realisa pa rindi honor na un gran baluarte di cultura di Aruba. Di su mes e acto di entiero a bira un acto cultural.

Despues di e ceremonia cu a tuma lugar na Cas di Cultura, e restonan mortal di Bernadina a ser transporta pa su cas na Brasil 43-F. Na yegada e bario a forma banda di caminda cu e matanan di maishi y gruponan di baile pa ricibi e cortejo fúnebre. Eynan tabatin gruponan cu a haci diferente presentacion y pa oranan di merdia a sali den un fila cu tur e gruponan presente, direccion pa misa Cristo Rey di Brasil.

Na misa di Brasil e caha di morto cu e festonan di “Mama di Cultura” ser ricibi pa e grupo di Flor di Brasil, sigui



pa Robert Maduro cu a canta canticanan cu sra. Growell tabatin masha aprecio pa nan, cu ta “Brasil ta un Bario” y “Roi Master”. Na inicio di ceremonia di misa Pastoor Jairo Maduro a bisa cu esaki tabata un Santo Sacrificio di Misa poco comun. E religioso a destaca e balornan espiritual y humano di “Mama di Cultura”.

“Bernadina henter su bida tabata un ofrenda pa Aruba mes”, asina pastoor Maduro a bisa. E

tabata un celebracion di misa masha bunita cu palabranan masha bunita dedica na Bernadina. “Nos misa a ser dorna manera un cunucu. E tabata stima su cunucu, awor e ta den cunucu di Señor”, asina pastoor Maduro a manifesta. Despues di un misa cu tabata completamente canta a sigui e acto final di despedida banda di 5’or atardi na santana di San Nicolas. Cu Bernadina Growell, “Mama di Cultura” sosega na paz.